



Mungu Mwenyewe Alikuwa

Mwalimu wa Danieli

Kwa maana wao wanaoniheshimu nitawaheshimu, na wao wanaonidharau watahesabiwa kuwa si kitu.—1 Samweli 2:30.

Katika kupata hekima ya Wababeli, Danieli na wenzake walipata mafanikio makubwa zaidi ya wanafunzi wenzao; lakini mafunzo yao hayakuja kwa bahati. Walipata maarifa yao kwa kutumia kwa uaminifu nguvu zao, chini ya mwongozo wa Roho Mtakatifu. Walijiweka katika uhusiano na Chanzo cha hekima yote, na kufanya ujuzi wa Mungu kuwa msingi wao wa elimu. Kwa imani waliomba hekima, na waliishi sawasawa na maombi yao. Wao walijiweka mahali ambapo Mungu angeweza kuwabariki. Waliepuka yale ambayo yangedhoofisha nguvu zao, na kuboresha kila fursa ya kuwa na akili katika namna zote za kujifunza. Walifuata kanuni za maisha ambazo hazingeweza kushindwa kuwapa nguvu ya akili. Walitafuta kupata ujuzi kwa kusudi moja—ambalo ni kumheshimu Mungu. Walitambua kwamba ili kusimama kama wawakilishi wa dini ya kweli kati ya dini za uongo za ukafiri lazima wawe na uimara wa akili na lazima waimarike katika tabia ya Kikristo. Na Mungu mwenyewe alikuwa mwalimu wao. Kwa kuomba mara kwa mara, kusoma kwa uangalifu, kuwasiliana na asiyeonekana, walitembea pamoja na Mungu kama Henoko alivyofanya.

Mafanikio ya kweli katika namna yoyote ya kazi sio matokeo ya kubahatisha, ajali au majaliwa. Ni utendaji wa riziki za Mungu, malipo ya imani na busara, wema na uvumilivu. Tabia nzuri za kiakili na maadili ya hali ya juu sio matokeo ya ajali. Mungu hutoa fursa; mafanikio yanategemea jinsi tunavyozitumia fursa hizo.

Mungu alipokuwa akifanya kazi ndani ya Danieli na wenzake “kutaka na kutenda mapenzi yake mema,” walikuwa wakishughulikia wokovu wao wenyewe (Wafilipi 2:13). Hapa kunafunuliwa utimilifu wa kanuni takatifu ya ushirikiano, ambao bila huo hakuna mafanikio ya kweli yanayoweza kupatikana. Juhudi za kibinadamu hazifai kitu bila uweza wa Mungu; na bila juhudi za kibinadamu, juhudi za Mungu hazina faida kwa wengi. Kufanya neema ya Mungu kuwa yetu wenyewe, lazima tufanye wajibu wetu. Neema yake imetolewa kufanya kazi ndani yetu kutaka na kufanya, lakini kamwe haipaswi kuwa mbadala wa juhudi zetu.

Kama vile Bwana alivyoshirikiana na Danieli na wenzake, ndivyo atakavyoshirikiana pamoja na wote wanaojitahidi kufanya mapenzi yake. Na kwa ujazo wa Roho wake atafanya imara kila kusudi la kweli, kila azimio zuri. Wale wanaotembea katika njia ya utii watakumbana na vikwazo vingi. Nguvu, mvuto wa hila vinaweza kuwafunga kwa ulimwengu; lakini Bwana aweza kufanya kila mpango kubatilika kwa ajili ya kuwapigania wateule Wake; kwa nguvu Zake wanaweza kushinda kila jaribu, kushinda kila shida (Prophets and Kings, 486, 487).